



Qilalukkanit qaqortanit tunisassianik Kalaallit Nunaanniit avammut annissisarnermik unitsitsigallarnermut atatillugu apeqqutit akissutillu

Apeqqut: Sooq qilalukkanit qaqortanit tunisassianik Kalaallit Nunaanniit avammut annissisarnermik unitsitsigallarneq atuutsinneqalerpa?

Allakkap Ullua: 03-03-2023
Suliap normua: 2023 - 1576
Allagaatip ilisarnaataa: 22716404

Akissut: Kalaallit Nunaat 1977-imiilli CITES-imujt (Convention on International Trade in Endangered Species of Wild Fauna and Flora) ilaasortaavoq. CITES nunani tamalaani uumasunik nujuartanik naasunillu nungutaanissamat ulorianartorsiortunik nunat killeqarfii akimorlugit niuerneramik nakkutilliinissamat isumaqatigiissutaavoq. Uumasogatigiit piujuartitsiviusumik piniarneqartut CITES-imi allassimasut kisimik niurutigineqarsinnaanissaat CITES-imi siunertaavoq. Qilalugaq qaqortaqa CITES-imi allassimavoq, Kalaallillu Nunaanni qilalukkanit pisarineqartunit tamanit tunisassianik avammut annissinissaq akuerineqarsinnaassappat, piniarneq piujuartitsinermik tunngaveqartussaavoq. Kalaallit Nunaanni qilalukkat qaqortat pisarineqartut piujuartitsinermik tunngaveqanngitsutut naliliiffigineqarpata, aammalu qilalukkanit qaqortanit tunisassianik avammut annissuineq uumasogatigiinnut sunniuteqarnerlussasoq mattunneqarsinnaanngippat, Kalaallit Nunaat avammut annissisarnermik unitsitsigallarnermik atuutsitsilernissamat pisussaaffeqarpoq.

Postboks 1614
3900 Nuuk
Tlf.: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Apeqqut: Sooq qilalukkanik qaqortanik piniarneq piujuartitsinermik tunngaveqarunnaartutut naliliiffigineqarpa?

Akissut: 2022-mi ukiakkut ataatsimiinnermi Naalakkersuisut Inatsisartunit peqquneqarput, Kangiani qilalukkanik qaqortanik teknikkikkut pisasseeqqullugit. Tullerriiarineq Kangiani innuttaasut neqissaqarnissaannik qulakkeeriniarneruvoq, naak tamanna qilalukkanit qaqortanit tunisassianik avammut annissinissamat periarfissanik atorunnaarsitsiffiusussaagaluartoq. Ilisimatusarnikkut naliliineq malillugu, Kangiani qilalukkanik qaqortanik pisassiisoqartussaanngikkaluarpoq, qilalukkat qaqortut ikittuinnaammata, aammalu qilalukkat qaqortat uumasogatigiit arlaanniit pinersut qulakkeerlugu ilisimaneqanngimmat. Taamaattumik qilalukkanit qaqortanit tunisassianik avammut annissuinerup uumasogatigiinnut sunniuteqarnerlussinnaanera mattunneqarsinnaanngilaq.

Apeqqut: Qilalukkanik qaqortanik avammut annissisarnermik unitsitsigallarneq Kalaallit Nunaannut tamarmiusumut atuuppa?

Akissut: Aap. Avammut annissisarnermik unitsitsigallarneq Kalaallit Nunaanni qilalukkanit qaqortanit uumasogatigiinnit tamanit tunisassianik

annissisarnermut atuuppoq, naak Kitaani qilalukkanik qaqortanik piniarneq piujuartitsinermik tunngaveqaraluartoq. Tamatumunnga Kalaallit Nunaanni ujarliutinik, qilalukkanit qaqortanit kitaaneersuunit kangianeersunilluunniit tunisassianik immikkoortitsisinnaasunik soqannginnera peqqutaavoq.

Apeqqu: Suli qilalukkanit qaqortanit tunisassianik tunisisinnaavunga?

Akissut: Aap, suli Kalaallit Nunaanni qilalukkanit qaqortanit tunisassianik tunisineq inerteqqutaanngilaq. Avammut annissisarnermik unitsitsigallarnerup atuutilernerani qilalukkanit qaqortanit tunisassianik nunanut allanut nassiussisinnaanngilatit, taakkunungalu assersuutigalugu Danmark ilaavoq.

Apeqqu: Nammineerlunga qilalukkanit qaqortanit tunisassianik Kalaallit Nunaanniit avammut nassarsinnaavunga?

Akissut: Aap, kalaaliminernit, uumasogatigiinnit CITES-imi allassimasunik, taakkunungalu qilalukkanit qaqortanit tunisassiat ilanngullugit, assersuutigalugu Danmarkimut angalaninni nammineq nerisassatut nassarsinnaavutit. Eqqaamaannassavat, Kalaallit Nunaanni ulluni ikinnerpaamik 185-ini najugaqarsimanerit uppernarsarsinnaasussaagakku. Assersuutigalugu najukkamut uppernarsaammik takutitsinikkut taamaaliorinnaavutit. Kalaalimernit, uumasogatigiinnit CITES-imi allassimasut Kalaallit Nunaanniit annikkukkit tuniniarnissaat inerteqqutaavoq.

Apeqqu: Qilalukkanit qaqortanit tunisassianik avammut annissisarnermik unitsitsigallarnerup kingunerisaanik susinnaajunnaarpunga?

Akissut: Avammut annissisarnerup unitsikkallarnerqarnerata kingunerisaanik qilalukkanit qaqortanit tunisassianik nunani allani inunnut tiguisusssanut nassiussisinnaajunnaarputit. Aamma nunat tiguisusssat qilalukkanit qaqortanit tunisassianik tiguisinnaanerit inerteqqutaavoq. Assersuutigalugu Danmarkimi ilaquuttannut ikinngutinnullu qilalukkanit qaqortanit tunisassianik nassussisinnaajunnaarputit. Tamatuma peqatigisaanik Danmarkimi ilaquuttatit ikinngutitillu qilalukkanit qaqortanit tunisassianik Danmarkimut eqqussisinnaajunnaarput.

Apeqqu: Avammut annissinissamik unitsitsigallarneq qanoq sivistigisumik atuutissava?

Akissut: Kalaallit Nunaanni qilalukkanit qaqortanit uumasogatigiinnit tamaniit piniarnerup piujuartitsiviusumik tunngaveqalersutut nalileeqqittoqarnissaata tungaanut, avammut annissisarnermik unitsitsigallarneq atuutissaaq. Pinngortitaleriffik Kalaallit Nunaanni uumasogatigiinnut CITES-imut ilaasunut piujuartitsinermut nalunaarusiortarpoq. Pinngortitaleriffiup CITES-imut

atatillugu piujuartitsinermut nalunaarusiortarnera pillugu annertunerusumik atuagaqarsinnaavutit, uani:

https://natur.gl/raadgivning/cites/?_gl=1*1av932j*_up*MQ..*_ga*OTgzNDgwNzA0LjE2NzUxODE5OTc.*_ga_3D8MCOTSM4*MTY3NTE4MTk5Ni4xLjEuMTY3NTE4MTk5OS4wLjAuMA..

Kalaallit Nunaanni qilalukkanik qaqortanik piniarneq periaatsit marluk uku atorlugit piujuartitsinermik tunngaveqalersinneqarsinnaavoq:

- Qilalukkat qaqortat, Kangiani pisarineqartut tamarmik kingornuttakkanik misissuiffigineqarnerini Kitaani uumasogatigiinnit amerlasuunit pisuusut paasineqarpat.
- Kangiani qilalukkanik qaqortanik piniarneq biologit siunnersuinerat malillugu unitsinneqarpat.

Kitaaniit qilalukkanit qaqortanik tunisassianik annissisinnaaneq periarfissaqarnerisq maanna Naalakkersuisut misissuiffigaat.

Apeqquut: Kalaallit Nunaat CITES-imut ilaasortaajunnaarpat, qilalukkanit qaqortanik tunisassianik avammut annissuisarneq pisinnaalissava?

Akissut: Kalaallit Nunaat CITES-imut ilaajunnaaraluarpalluunniit, qilalukkanit qaqortanik tunisassianik Danmarkimi ikinngutitut ilaquttanullu nassiussisinnaaneq allanngussanngilaq. CITES isumaqatigiissutaavoq, uumasunik naasunillu ulorianartorsiortunik niueruteqarnermik maleruagassiuiffiusoq. Taamaattumik nunat ilaasortaasut uumasogatigiinnik CITES-imi allassimasunik annissinissamut eqqussinissamullu maleruagassiortarput. Kalaallit Nunaanni CITES-imut ilaasortaajunnaarnissaq naalakkersuinikkut aalajangiiffigineqarsinnaavoq. Tamanna pissappat, Kalaallit Nunaanniit uumasogatigiinnik CITES-imi allassimasunik nunanut, CITES-imut ilaasortanngorsimangitsunut annissisoqarsinnaalissaaq. Kisiannili nunanut allanut 183-iusunut, CITES-imut ilaasortaasunut tunisassianik CITES-imut ilaasunik avammut annissisoqarsinnaassanngilaq, nunat taakku uumasogatigiinnit piujuartitsinissamut nalunaarusiorfigineqanngitsunit tunisassianik eqqussinissamut akuersissutinik tunniussisinnaanngimmata. Taamaattumik kalaallit CITES-imut ilaasortaajunnaarnerisa kingunerisaanik, uumasogatigiinnit CITES-imi allassimasunit tunisassiat Kalaallit Nunaanniit nunanut CITES-imut ilaasortaasunut annissisoqarsinnaajunnaassaaq. Danmarkip saniatigut aamma nunat allat Kalaallit Nunaannut takornariarpassuarnik tikittoqartarpoq, taamaattumillu taakku uumasogatigiinnit CITES-imi allassimasunit tunisassianik angerlaassisinnaanngillat.